

corone, et qual è di Re di romani che si corona in Aquisgrana da essi Electori, et qual è le tre corone quando el Re di romani vol farsi Imperador, con altre parole. Feci bona renga, et mi portai ben.

Mi rispose sier Thomà Mocenigo savio a Terra ferma, et ringratiò il Consejo di averlo electo a tal grado. Altri non volse parlar, ni Savii volse conzar la parte; la qual letera andoe. Ave 39 di no, 148 di si, et fu presa.

Fu posto, per li Savii, una limitation a Brexa zercha compir quelle fabriche, *videlicet* limitarli ducati 300 al mexe di danari di la camera, et 300 di la Comunità, et 300 dil territorio, in tutto ducati 900, et fu presa. Avè 166 di si, 12 di no, una non sincera.

Fu posto, per li Savii ditti, una parte molto longa, qual ha assà capi zercha l'alveo di l'acqua di la Rosà, *ut in ea*, tutte cosse aricordata per sier Gasparo Contarini stato Provedador di li etc. Fu presa. Il sumario dirò qui avanti.

Fu posto, per li Savii, zerta expedition di 5 capi di stratioti stanno in Friul per lanze spezade, *videlicet* confermarli quanto li è stà promesso quando servino in campo a raxon di page 6 a l'anno, *ita* che vien a crescer in tutto ducati 13, *videlicet* a Zorzi Grimani, Zuan Valami, Zuan Giamberi, Manoli de Monojani, et Zorzi Gambiera, *ut in parte*. Ave 134 di si, 6 di no, 4 non sincere, non ave il numero. *Iterum* balotà, ave 162 di si, 12 di no, 2 non sincere. E fu presa.

Fu posto, per i Consierl, Cai di XL, Savii dil Consejo e Terra ferma, dar a sier Alvisè Bon el dottor, stato orator in Hongaria più de anni 3, e ha patito gran danni, 4 cope d'ariento dorade val zercha ducati 150, le qual 4 cope erano stà portate per il prefato Orator in Pregadi, e tutti le vedeva, con questo li ducati 20 li ha dati, zoè 10 in Polonia et 10 in Hongaria, di dono a chi le portoe, vadino a so conto; *etiam* non possi domandar altro danno a la Signoria nostra. Et mandato fuora lui e li soi parenti, ave nulla non sincere, 66 di no, 131 di si. Non fo presa alcuna cossa, perchè la vol numero di ballotation limitade, et *iterum* ballotata, ave 67 di no, 130 di si, *nihil captum*, et le cope fo mandate da basso a li Cai di X, le qual si manderano in Procuratia.

Fu posto, per i Consieri e Cai di XL, una gratia a uno di Seravalle nominato maestro Nadal de Pinadello, fabro maestro di far schioppi, archibusi e altri ferì deputadi a la militia, il qual vol far uno edificio a questo effecto di farli in la villa di Pinadello ter-

ritorio di Seravalle. Però messeno di conciederli quanto el dimanda, *ut supra*, et fu presa. Avè 117 di si, 14 di no.

Fu posto, per li Savii, expedir per Colegio una deferentia di certi tentori per una sententia fe' sier Donà Marzelo *olim* Locotenente in Cypro, *ut in parte*. Fo presa : 135, 15, 1.

Fu lecta una suplicatione di le monache di Santa Catarina, di Sachi di Venezia debitore di decime di ducati 90 in zercha, sia suspeso il suo debito per anni 5, *ut patet in ea*. 157, 2.

Fu posto, per li diti, suspender il debito di sier Zuan Batista Querini qu. sier Polo debitor di la Signoria nostra per anni do, *ut in suplicatione* per anni do, e fu presa. Avè 178, 6.

Fu posto, per li diti, suspender i debiti di sier Lorenzo da Molin qu. sier Bernardo debitor di perdeda di daci, *ut in suplicatione*, per anni do, et fu presa. Avè 154, 13, 1.

Fu posto, per li diti, suspender il debito di sier Alvisè Tiepolo fo di sier Lorenzo, per anni do, debitor di ducati 70, et fu presa. 178, 2.

Fu posto, per li diti, suspender i debiti di Zuane Alvisè Belon fo di Domenego, secretario nostro, *olim* debitor di perdeda di daci, et di ducati 30 di dexime per anni do, et fu presa. 172, 1.

Morite in questa note passada sier Luca Miani qu. sier Anzolo, qual ave per gratia in Gran Consejo per 5 rezimenti la castellanaria di Quer appresso Feltre, perchè 'l fu castelan in la Scala fu fato preson di todeschi et ferido et si portò virilmente. È stato in ditta castellanaria rezimenti do, era di età di anni . . . e lassa do fiole, et è morto da febre in zorni 5.

A dì 22. Fo la Madalena. Veneno molti todeschi di Fontego, merchadanti, in Colegio a dolersi che da li oficiali di Margera uno loro corier, qual veniva di Alemagna con letere et danari, le letere era stà tolta la bolza volendo veder quello era dentro, è cose insolite far, tajando la cintura et butando la bolza in terra; per il che il Principe con il Colegio monstrono averlo molto a mal et ordinò che ditti oficiali fosseno retenuti.

Da poi disnar fu gran caldo. Fu Gran Consejo, fato uno Avogador di comun sier Nicolò Salamon fo avogador di comun di sier Michiel el consier, qual non voleva esser tolto. Fu tolto lizieri scontri, et io non fui nominato, e tanti havia che mi toleva. Pacientia!

Di Pregadi rimase sier Andrea Marzello fo di Pregadi qu. sier Antonio, qual ha titolo per danari, da sier Giacomo Corner fo Luogotenente in la Patria